

No Servus, Diener und Habe die Ehre!

Etze kummt dos

Nej su wos

vu Sömde, n 07. Juli 2023



Ingrid Zasche

Dr Wappnboum

Unlängst hotte s an Gablunzer Hause ane Birgervrsommlung. Dou sellte mr olles sohn, wos enn ei Neugablunz ne gefällt und s kom ou ollrhand zomm. Mehrschtns totn de Leute klohn, doss de Wouhnstroußn zugeparkt wärn. Etze hon halt ville Familien ne ock ej Auto frn Votr, nej, de Muttr und amende ou de grußn Kindr brauchn ou olle ejs, und die aln Häusl hon halt, wenn iebrrhaupt, ock ane ejntsche Karasche. Dr Borgemejstr mejnte, s täte sich olles ändern und kimftlich wier mr abn nemieh ieberole bös vur de Haustierte fohrn kenn und misste eftersch amoul a poor Schriete per Pfute giehn.

Dos wäre etze ou su bar Ömgestaltung vu n Birgerplotze – dar selle „autofrei“ wardn. Uf m Plone sog mr ville Bejmr und ar Mötte, wu frieher dr Wappnboum stond, wor a grußer runder Born mit enner Fontäne hiegemoult. Dou ho ich schun amoul froun missn, wosse denn mit dan Wappnboume gemacht hättn, o dan de aln Neugablunzr sehr hängn, und eb se iebrrhaupt dro dächtn, dan Boum wieder ufzustelln. Dar Mon vu n Bauamte sohte druf, nej, s täte etze ei Neugablunz su ville Neubirger aus su villn Ländrn gahn, dou misste mr jo fr die olle ou a Wappn drohängn, und dasdrwajgn tätn se dan Boum lieber ganz weglossn. Dar gude Mon hotte iebrrhaupt ne kapiert, doss dar ale Wappnboum a Denkmoul ös fr olle die Mannr und Froun aus dan dötn Wappnurtn, die Neugablunz gegrindet und mit ihrn Fleiße ufgebaut hon. Vur olln wajgn dan Vrtriebne ös Kaufbeuern doch aus senn Dornrieslschlouf drwacht und hout - ou möt Hilfe vu dan geherichn Steuern vu n Schmuckfabrikantn und Expoteern - zu sanr heutichn Grieße vu iebr 47000 Eiwuhnrn wachsn kenn. Dou hon sich de Grinder doch wingstns dan Wappnboum os ollgemejnes Denkmoul vrdinnt, und ne, doss mr n wegräumt, weil s r jo amende bale gornemieh ville aus dan Wappnurtn ei Neugablunz hon wörd. Genau su gutt kennte mr n „Nacktn Mon“ wegmachn wolln, weil ha nemieh „zeitgemäß“ ös und weil de villn Neubirger ei Kaufbeuern die Noum vu dan Gefollnen, die dorte ufm Sockl stiehn, suwiesu ne kenn...

Wingstns soll dar uf n Birgerplotze geplante Born ne wieder su ane schieche, vierecksche, rost-sche Blajchwanne wardn wie dos nöschtsohnde Plantschbecken, wosse aus n Isergebörbsborn uf n Neuen Morchte gemacht hon. Dou hout ou su a Architekthe gemejnt, ha misste „modern“ sein und ös ne gewohre wurdn, doss dar Bornstejn uf n Neuen Morchte o a Qualchl aus n Isergebörge derönnern soll. Su wie dr Isergebörbsborn vurhar aussog - möt Naturstenn und Bliemln eigefosst - hout a dos ou gemacht. Etze nemieh. Schode dröm.

Nujo, de Pläne fr dan neuen Birgerplotz sein an Stodtroute noch ne endgiltlich beschlossn. Amende finden se toch noch a Platzl fr dan Wappnboum. Glei wie mr n weggemacht hout, weil de Wappnbefestigungn herich nemieh söcher wärn, hon a poore vurseschloun, mr kennte dan Boum nouch n Repariern uf dan grinn Eck o dr ParIngosse nabn n Gablunzer Hause ufstelln. Dou wär a ne an Wajge und trotz olledan noch dou. Uf ane Hampfl neue Edlstohlbefestigungn kon s bei dan ganzn Kostn fr de Ömgestaltung vun Birgerplotze doch ou schun nemieh okumm. Und wenn s wörklich o dan poor Kreuzern hängn sellte - ich glejb, dou täte sich amende sugor noch dr ejne odr andre grußziegiche Stifter finden.

Mejnt dr ne ou?
